

أتوبيس ٢١

المنظر: محطة عادية تكتظ بالناس . . نصفهم يقف في وسط الشارع من فرط الزحام . . والنصف الآخر يقف بداخل المحطة . . . والوجوه عابسة بائسة . . .

الحاجة أم فتحة: إللا قوللي يا بني . . هو ، أتوبيس واحد وعشرين بيعدي من هنا؟! . .

عم عوضين: (دون أن يلتفت إليها) إن شاء الله يا حاجة .
الحاجة أم فتحة: يجعل في وشك القبول يا بني . . لحسن أنا حتماً ولا بد أروح المستشفى اللي يقولوا عليها دي أجيب للواد العلاج . .

عم عوضين: (متضرراً) ما قلنا إن شاء الله يا حاجة!
(في هذه اللحظة يتقدم «حَدُقة» البائع المتجول بالمنطقة)

حدقة: أيوة . . نظارات . . ساعات . . حاجات بتاعة بره . .
أيوه . .

عبد الباسط أفندي (يستوقفه): حاجات بتاعة بره إيه يا أخينا

إنت .. كفاية بقه ضحك على الناس الغلابة .. وبعدين مالها يعني الحاجات بتاعة جوهر؟ هه؟ (ثم أشار إلى بدلتة) .. ما هي حلوة أهي زي الفل .. (يلتفت إلى عم عوضين): واللا إيه رأيك يا أستاذ ... ؟

عم عوضين: والنبي يا خويا سييني في حالي أنا مش ناقص ...
عبد الباسط أفندي: (ينظر إليه كطبيب ينظر إلى مريضه): ما لك يا أخي؟! مكشركده ليه .. دي حتى الدنيا لسه بخير .. طب دانا أول إنبارح قلت: آخذ العيال ونروح ...

عم عوضين: (مقاطعاً وهو يزيحه جانباً): يا أستاذ ما قتللك أنا مش طابق حد .. والنبي سييني الساعادي ..

عبد الباسط أفندي: (ينظر إليه ملياً ثم يلتفت إلى الناس): هو ماله مقفل كده ليه؟! ..

الحاجة فتحية: أهو زي ما أنت شايف .. على الحال ده من وش الصباحية ..

عبد الباسط أفندي: الله؟! هو انتم قاعدين هنا من وش الصباحية؟

الحاجة أم فتحية: أيوه يا خويا .. بس أنا عارفة .. العفريت ناطط في وشه كده ليه؟! ..

عم عوضين: بس يا وليه إنت بدل ما

عبد الباسط أفندي: (مقاطعاً) بدل ما إيه يا حضرت؟! إنت فاكِر نفسك فين؟! عشان يعني دي واحدة ست غلبانة تكلمها بالشكل ده . . لا . . لا . . مالکش حق أبداً . . (ثم يلتفت إلى الحاجة أم فتحة) . . معلى يا حجة . . حقك عليّ أنا . .

عم عوضين: (وهو يقترب من «عبد الباسط» كأنه سيضربه): هو أنا كلمتها خالص؟!!

حدقة (يتدخل): خلاص يا خوانا حقكو عليّا أنا . . أنا غلطان . .

عم عوضين: (يلتفت إلى حدقة): مانتاش شايف الراجل ده بيقول إيه . . اللهم طولك ياروح

حدقة: (يقبل رأسه) معلى حقك عليا . . آمال اسم الكريم إيه؟ . . .

عم عوضين (في ضجر): عوضين .

حدقة: سعادتك لازم موظف؟

عم عوضين: (وهو يلتفت إلى عبد الباسط الذي أخذ يكلم الحاجة فتحة): لأ . . ثم أردف بصوت أجش: جزار . . . جزار . . .

حدقة: (يبتلع ريقه بصعوبة): أنا قلت كده برضه.. ألا قوللي يا عم عوضين هو كيلو اللحمه بكام دلوقت؟! .
 الحاجة فتحية: (تلفت إلى الحوار باهتمام عندما تسمع كلمة لحمه):

عم عوضين: بحوالي ريال...
 الحاجة فتحية: (في ذهول) بصحيح يا بني اللحمه عندك بريال بس؟! .

عم عوضين: أيوه بريال..
 حدقة: الحاج عوضين قصده عشرين جنيه يعني..
 الحاجة أم فتحية: (تخبط على صدرها): يامصيتي. هو الريال بقه بعشرين جنيه؟! .
 عبد الباسط أفندي: إلا قوللي يا بني.. إنت قلتلي اسمك إيه؟..

حدقة: محسوبك حدقة يا بيه.
 عبد الباسط أفندي: (في أنفة): بكام الساعة من دول يا حدقة..
 (حدقة يقترب منه ويريه الساعات التي يمسكها بيده):
 حدقة: أي حاجة هنا بيعها بشلن.. خمسة جنيه يعني.. إنما حاجات إيه.. ولا المستورد.

عم عوضين: (وهو يفكر بصوت عال): يعني الساعة برع كيلو ضاني؟!

حدقة: (وقد ازداد أمله في أن يبيع شيئاً): أيوه .. يابيه .. الساعة دي مثلاً حاجة آخر حلاوة .. بس إيه .. ولا البتلو .. الحاجة فتحية: أنا مش فاهمه حاجة أبداً .. يعني الساعة برع كيلو والا بريال والأ يايه .. دي حاجة تلخبط أوي ..

عبد الباسط أفندي: ولا تلخبط ولا حاجة يا حاجة .. ما هي الدنيا مشيا كده .. اللي معاه حق كيلو البتلو يجيلوا أربع ساعات واللي معاه حق الكندوز .. يجيب كندوز ..

الحاجة فتحية: (متحسرة): طب واللي معهوش؟!

حدقة: (ضاحكاً): ياخودلوا ربع ساعة .. هاهي ..

نظر حوله عسى أن يضحك أحدهم ولما لم يضحك أحد كاد أن يتفوه بشيء إلا أن عم عوضين قاطعه ...

عم عوضين: (يتأمل الساعة وما زال يحسب): والله معقول .. طب ما تورينا كده الحاجات اللي معاك .. (يبدأ عم عوضين وحدقة في الحديث ليتما البيعة .. عندما يقترب شاب متعلم من الجمع تبدو عليه الأناقة) ..

أحمد: السلام عليكم.

عبد الباسط أفندي: وعليكم السلام ورحمة الله وبركاته.

أحمد: مش أتوبس واحد وعشرين بيعدي من هنا برضه..

الحاجة فتحية: أيوه يا بني كلنا مستنيين من وش الصباحية..
أنا عارفه هو بيجي متأخر كده ليه؟.

أحمد: (في صوت مسموع نسيًا): على الله ما يتأخرش أوي
أحسن لازم أروح الكلية أخلص المشروع بتاعي.

الحاجة فتحية: ربنا وياك يا بني.. قلبي داعيلك.. لأجل
خاطر أنا ابن أختي فوقية شاب زيك كده تمام.. على وش
امتحانات..

أحمد: وييدرس فين يا حاجة؟

الحاجة أم فتحية: ورا الجمعية اللي عند الحاج محمود..

عبد الباسط أفندي: (إلى الحاجة أم فتحية). لأ: الأستاذ
قصده بيدرس في أنهي كلية يا حاجة..

الحاجة أم فتحية: كلية؟ (تفكر قليلاً) آه في كلية الثانوية
العامة..

أحمد: آه.. في الثانوية العامة.. ربنا يكون في عون
والله.. دي حاجة صعبة أوي..

الحاجة أم فتحية: أنا عارفة ياخويا هم بيعملوا كده ليه في العيال.

أحمد: وياريت الواحد منا لما يخلص يلاقي شغل حته..
عبد الباسط أفندي: ولا الدروس الخصوصية.. دي حاجة تخرب البيوت..

أحمد: فعلاً.. دي بقت غالية قوي.
حدقة: (يخاطب عم عوضين): ولا غالية ولا حاجة.. دي حتى ماشية مع لون الجلالية يا حاج.
عم عوضين: (وهو ينظر إلى الساعة حول معصمه): بس أوعى تكون مضروبة لحسن أخرب بيتك..

حدقة: عيب يا حاج.. دانا حتى شغال هنا في المحطة واسأل عني دي ساعة لقطة.. وأشاح بيديه يمنة ويسرة وهو يستطرد:
ممكن تقدمها.. ممكن تأخرها.. حاجة بتاعة بره.. والا إيه يا أستاذ؟ (يلتفت إلى أحمد).

أحمد: أفندم؟..

حدقة: (وهو يغمز بعينه إلى أحمد): إيه رأيك في الساعة دي؟

أحمد: كويسه.

عم عوضين مخاطباً أحمد: يعني ممكن تقدم وتأخر زي ما
يقول؟

أحمد: طبعاً بس كل السا... .

عم عوضين (مقاطعاً): مبسش ولا حاجة (يلتفت إلى حدقة
ويناوله مبلغاً من المال).. دانا حتى قلبي استريح لك من ساعة
ما شفتك... .

الحاجة أم فتحة: سبحان مغير الأحوال!

أحمد: لكن يا حاج.. .

حدقة: (وهو يلكزه): عندي بقى شوية نظارات إنما إيه.. .
حاجة جمس بوند خالص.. .

أحمد: لا.. لا شكراً.. مش عايز.. .

الحاجة أم فتحة: (هي تسأل أحمد): مش هو ده أو. أو سيفن
يا بني؟ حاكم أنا ابن أختي فوقية طول النهار والليل سايب
المذاكرة بتاعته ويتفرج عليه في الفيديو. اللي جابهوله أبوه.. .

حدقة: (يترك أحمد ويلتفت إلى الحاجة أم فتحة) باس... .
أنا منك يا حاجة تجييلوا النظارة دي هدية نجاحه بإذن واحد
أحد.. ده يفرح بيها موت. (يبدأ حدقة والحاجة أم فتحة في
الحديث ليتما البيع عندما يظهر في الضوء رجل ذو لحية كبيرة

يلبس جلباباً شرعياً يمسك في يده سواكاً ينتظر مع المنتظرين).
 الشيخ عبد ربه: الله ولي الصابرين.. وحدوا الله يا خوانا..
 — لا إله إلا الله.

الشيخ عبد ربه: محمد رسول الله.. نشهد أنه بلغ الأمانة
 ونصح الأمة وكشف الغمة ووضع لنا الطريق المستقيم لتبعية..
 ولكننا نحن الذين فرطنا فيه، نحن المسؤولون أمام الواحد الديان
 يوم القيامة.. يوم لا ينفع مال ولا بنون إلا من أتى الله بقلب
 سليم.. نحن الآن في زمن شاع فيه الغلا.. وكثرت فيه الزلازل
 والمحن.. الشباب لا يجد المسكن.. الحافلات لا تصل إلى
 المحطات.. (ينظر إلى حذقة).. زمن شاعت فيه السرقة
 والاستغلال.. زمن يُوقر الزناة وتُنس الصلاة، تؤكل اللحوم
 ويُنس الصوم..

عم عوضين: الله الله الله... مالها اللحوم ياسيدنا الشيخ؟
 عبد الباسط أفندي (للشيخ): يا أخي سيبها على الله.. بكرة
 تفرج.. بس إنت توكل على الله...

الشيخ عبد ربه: أهو ده اللي إنتم فالحين فيه.. هذا يُسمى
 تواكلاً يا أستاذ.. مش توكل.. أستغفر الله العظيم.

أحمد: ياه.. ده الأتوبيس إتأخر أوي.. أنا مش هلحق

أخلص المشروع كده أبداً.

الشيخ عبد ربه: في التآني السلامة يا بني وفي العجلة الندامة .
الحاجة أم فتحة: عجلة إيه . . وعربية إيه يا شيخنا. الولد عند
مذاكرة وكلنا ورانا مصالح ، أنا عارفة نمرة واحد وعشرين ده
مش عايز يبجي ليه؟

أحمد: (وقد بدأ يفقد أعصابه): حتى لو جه . . تفكروا يعني
هنلاقي مكان . . ده لو ربنا سهلها ولقينا مكان نقف فيه في
الأتوبيس حتى . . حنقعد نطلع في السكة بتاع ساعتين كمان . .
أنا عارف إزاي عايزين البلد تتقدم وما فيش أي نظام خالص
كده؟!

عبد الباسط أفندي: (وهو يحاول تهدئته): معلش يا بني إن
شاء الله ربنا هيسهلها وتلحق تخلص المشروع بتاعك . .

أحمد: هو حضرتك مستني أتوبيس واحد وعشرين برضه؟
عبد الباسط أفندي: أيوه يا بني كل يوم بالشكل ده: أقعد
أستني أتوبيس واحد وعشرين من الصبح لحد المغربية كده . .
لكن برضه ما بيجيش أقوم أخذها كعابي لحد محطة فم الخليج . .
ولكن التساهيل على الله يا بني أهى مستورة والحمد لله .

أحمد: يعني حضرتك مشفتش أتوبيس واحد وعشرين ده أبل
كده أبداً؟

عبد الباسط أفندي: لا والله يا بني.. طب دانا مرة واحد
بلديتنا من ستين حلف يمين ليستنا أتوبيس واحد وعشرين لغاية
ما يشوفه فقعد مستنيه..

أحمد: وياترى شافه؟

عبد الباسط: الله يرحمه بقه..

أحمد: هو مات!!؟

عم عوضين: لازم مات من الغيظ!

عبد الباسط: لأ مماتش ولا حاجة أهو زي متو شايفينه هناك
أهو: (أشار إليهم إلى بطانية مفروشة على الرصيف لم تكد تظهر
ويتلحفها رجل مسن ذو شعر طويل ولحية غير مهذبة).

الحاجة أم فتحية: ياخبر أسود علي.. (وهي تخطب على
صدرها): إنت قلت لي الراحل ده بقاله أد أبيه ، ياخويا؟

عبد الباسط: ستين بس يا حاجة.

عم عوضين: (وهو يمسك بجلاية عبد الباسط) ستين يعني
إيه.. أنا كده أخرب بيوتكوا.. إحنا ورانا مصالح ياناس..

أحمد (يتدخل ليفض النزاع): طب هو الأستاذ دخله إيه ياعم
عوضين.. مش كده أمال..

عم عوضين: دخله إيه إزاي.. ده يقولك ستين..

الحاجة أم فتحة: عليه العوض ومنه العوض .. ياخوانا ..
دانا لازم أجيب للواد العلاج.

عبد الباسط: ياخوانا .. استهدوا بالله كده وربنا هيفرجها إن شاء الله ..

أحمد: بس دي مش طريقة أبداً كده ... طب على كده ممكن أوتوبيس واحد وعشرين ما يجيش خالص!

عم عوضين: (يمسك جلاية أحمد): ما بيجيش إزاي .. هي البلد سايبة؟

(ثم يتجه إلى الرجل النائم تحت الغطاء): إنت ياخي إنت ..

الحاجة أم فتحة: بالراحة عليه شوية أحسن تسرع ...

عم عوضين: (وهو يهزه بقوة): إنت ياخويا .. (وينزع الغطاء من على رأسه فيظهر الرجل مرتدياً نظارة من نظارات حدقة).

عبد الحي: إيه في إيه؟ !

الشيخ عبد ربه: الله ولي الصابرين.

عم عوضين: إصحي ياراجل إنت.

عبد الحي: الأوتوبيس جه .. ؟

عم عوضين (في شراسة): لأ لسه ماجاش .. ثم استطرد في

صوت أجش: ما جالاش!

عبد الحي : (وهو يهم أن ينام مرة أخرى): آمال صحتوني ليه
بس ياخوانا حرام عليكم. (في هذه الأثناء يسمع الجميع صوت
من الجمع يهتف) جه.. أتوبيس واحد وعشرين جه.. أتوبيس
واحد وعشرين جه. (يلتفت الجميع إلى مصدر الصوت وسط
جلبة شديدة وهتاف من الناس)

الشيخ عبد ربه: الله أكبر..

أم فتحية: (تزغرد).. بركاتك يا إبراهيم يا دسوقي!

عبد الباسط: (يلتفت إلى أحمد): مش قلتك هتفرج يا بني؟!

الشيخ عبد ربه: .. أين تلك الحافلة اللعينة؟

حدقة: شوف كده بالنظارة دي.. هتوريك أكثر.. ثمنها
عشرة جنيه بس.

الشيخ عبد ربه: إليك عني يا صاح..

الحاجة أم فتحية: ياجدعان.. فين الأتوبيس ده اللي بتقولوا
عليه؟

(يسكت الجميع ويحدقون إلى الأمام يحاولون رؤية
الأتوبيس)

أحمد: ده باينه أتوبيس سياحة مش نقل عام..

الحاجة أم فتحية: عام إيه وغرق إيه يا بني .. يعني هو ده
أوتوبيس واحد وعشرين ولا مش هو؟

عبد الباسط: إن شاء الله هو ..

عبد ربه: سياحة؟ .. إنت بتقول سياحة .. (يكفهر وجهه أكثر
من ذي قبل ويدخل السواك في جيبه ويخرج هاتفاً محمولاً من
جيبه الآخر) القادسية ينادي صلاح الدين .. القادسية ينادي
صلاح الدين .. اقترب الهدف من المنطقة .. 34 أجب ..

الحاجة أم فتحية: هو إيه يا خواتي ده؟

عبد الباسط: (وهو يدقق النظر): باينه هوه ياخوانا.

عم عوضين: أنا مش شايف أي حاجة أبداً .. (وهو يدقق
النظر)

حدقة: جرب بالنظارة دي كده ..

عم عوضين: إنت قلتلي بكام؟

حدقة: بعشرة جنيه بس يا حاج ..

عم عوضين: بس أنا معيش يا بني والله .. دي هي الخمسة
جنيه اللي دفعتهم في الساعة كانوا آخر حاجة عندي ..

حدقة: (كأنه يفكر): اقولك يا حاج: إيه رأيك بتبدل الساعة

بالنظارة؟ منها تشوف الأتوبيس ومنها تبقى وفرت خمسة جنيه؟! ...

عم عوضين: والله معقول (وهو يطلع الساعة) مش بقولك إنت ابن حلال ..

الحاجة أم فتحية: هو واللا مش هوه ياناس حد يرد عليا؟

عبد الباسط: هوه إن شاء الله يا حاجة!

عم عوضين: (وهو يلبس النظارة): فين .. أنا مش شايف أي حاجة؟!

عبد ربه: سياحة ولا عام؟!

أحمد: يارب عام ...

الجميع يردد: يارب .. يارب ..

عبد ربه (مكرراً): يا جماعة .. سياحة .. ولا عام ..؟!!

الجميع يردد: يارب عام .. يارب عام ...

عبد ربه: (بصوت عال): سياحة ولا عام؟!

الحاجة أم فتحية: إيه ياخواتي ده؟ عام ولا قرن بس المهم نلحقه ...

الجميع يردد: يا رب عام 21 .. يا رب عام 21 يا رب عام

21 ..

(ثم البعض يردد): يا رب القرن .. 21 يا رب القرن 21 .. يا رب القرن 21 .. (بصوت منخفض) – (ثم الجميع يردد: يا رب القرن 21 .. يا رب القرن 21 .. يا رب القرن 21 (الصوت يعلو تدريجياً). (ويعلو .. ويعلو .. ويعلو) .. (ثم فجأة يسكت الجميع).

أحمد: وهو وقف ليه؟

عم عوضين: (مازال مرتدياً النظارة): أنا مش شايف أي حاجة أبداً ..

أحمد: (يسأل حدقة): هو في محطة ثانية هنا؟ ..
حدقة: إيه؟

أحمد: بقولك في محطة ثانية هنا قُرْب؟
حدقة: أصل ..

أم فتنحية: (وهي تلمطشه على رقبته) أصل وفصل إيه ما ترد على الأستاذ ياواد إنته ..

حدقة: أصل ...

عبد الباسط: ما تقول يا بني حيرتنا معاك ...

أحمد: قول يا حدقه محدش ها يعملك حاجة ..

حدقة: في خبث .. أصل في الحقيقة إنتو كلكو واقفين غلط ..

أم فتحية: غلط في عينك ياواد.. (تمسكه من جلابيته وتهزه)
عبد الباسط: إستني يا حاجة بس لما نشوف بيقول إيه..
الحاجة أم فتحية: أستنى إيه بس.. متتش شايف الواد المتنيل
على عينه ده بيقول إيه؟..

أحمد: (في شك): قصدك إيه يا حدقه.. حدقة (وهو يزيح
أم فتحية عنه)

حدقة: زي مبقولكو كده: كلكو واقفين غلط...

عبد ربه: (يخرج المحمول) القادسية ينادي صلاح الدين..
القادسية ينادي صلاح الدين.. يوجد خلل في الخطة.. أجب.
عبد الحي: (يستيقظ): ياخوانا ريحوا نفسكو.. واعملوا
زيي.. أتوبيس واحد وعشرين ده مش لينا إحنا.. ده بييجي في
بلاد برة بس... ده حتى في بلاد برة بيبقى مكيف كمان...

أحمد: (لا يلتفت إلى عبد الحي ويخاطب حدقة): فسر
كلامك يا حدقة (عبد الحي يخلد إلى النوم مرة أخرى) !

حدقة: يا حضرت كلامي مش عايز تفسير.. كل اللي عايز
أقوله لكم إن أتوبيس واحد وعشرين ما بيعديش من هنا
خالص.. !

(الجميع يتسمر في مكانه دون أدنى حراك... ثم يبدأ واحد

تلو الآخر في أن يلبس نظارة سوداء من حدقة .. ثم يتسمرون مرة أخرى).

الحاجة أم فتحة: يا وقعتك السوداء!

عبد الباسط: لاحول ولا قوة إلا بالله ..

عم عوضين: أنا حسوي قاتل النهاردة ..

أحمد: المشروع !!! (ثم يلتفت إلى حدقة الوحيد الذي لا يلبس نظارة سوداء) مقولتش ليه من الأول طيب؟

عم عوضين: عشان تبيع هه؟!

حدقة: دنا زي ضناك برضه يا حاج ..

عم عوضين: ضنايا ده إيه .. دنا هخليك ضاني ياواد يابن ..

(يمسك حدقة ويضربه ...).

أحمد (يتدخل): ياخوانا: كده إحنا بنضيع وقت .. الأوتوبيس لسه واقف هناك أهو .. ولو حاولنا يمكن نلحقه ..

عم عوضين: (وهو يمسك حدقة عالياً) نلحقه؟ نلحقه إزاي؟

أحمد: نجري .. لو جرينا يمكن نلحقه ..

عم عوضين: (يترك حدقة): حسابك معايا بعدين .. (يبدأ

الجميع في الجري ببطء) أحمد في المقدمة ثم عم عوضين ثم أم فتحية ثم عبد الباسط ثم عبد ربه ..

عم عوضين: مش هنلحق كده أبداً ..

أحمد: لازم نحاول يا خوانا .. مش ممكن نوصل أوتوبيس واحد وعشرين من غير ما نتعب ..

الحاجة أم فتحية: دانا نفسي اتقطع يا بني .. مش قادرة خلاص ..

أحمد: حاولي يا حاجة حاولي ..

عبد الباسط (يهتف): الأوتوبيس بدأ يتحرك ..

عبد ربه: متنسوش دعاء الركوب ياخوانا ..

عم عوضين: أنا حاسس إن إحنا مش بنتحرك خالص ..

أحمد: (وهو يخلع نظارته): اخلعوا النظارات يا جماعة ..

(يجري أسرع عندما يخلعها .. الجميع يخلع نظارته ويرميها على الأرض) وتزداد سرعتهم ..

حدقة (وهو ينادي على زبائن جدد): أيوة نضارات ..

ساعات حاجات بتاعة برة ... أيوة

